

A C T A 13/2019
SESIÓN ORDINARIA PLENO MUNICIPAL
- 25 DE SETEMBRO DE 2019 -

Na Casa do Concello, a vinte e cinco de setembro de dous mil dezanove, reúnen-se en primeira convocatoria os/as señores/as concelleiros/as que se relacionan a continuación, baixo a presidencia do sr. alcalde, D. Rafael C. Sisto Edreira, co obxecto de celebrar a sesión ordinaria correspondente ao día da data, para a que foron debidamente convocados/as.

ASISTENTES:

Alcalde:

D. Rafael Carlos Sisto Edreira

Concelleiros/as:

D.^a Iria Otero Romero
D. Xosé Ignacio Iglesias Villar
D.^a María López Álvarez
D. José Manuel Guerra Calvelo
D. Antonio Reyes Sánchez Crespo
D.^a María Vázquez Rey
D.^a María Dolores Nariño Facal
D.^a María Teresa Castro Framil
D.^a Lucía Calvo de la Uz
D.^a Margarita Rosende Domínguez
D.^a Uxía Lemus de la Iglesia
D. Roberto Moñino Gil
D.^a María Josefa Argibay da Silva
D. José Manuel Elías Noya
D. Manuel Anxo Fernández Baz
D.^a Carmen Diéguez González

Secretaría acctal:

D.^a M^a Elena Sueiro Fernández

ORDE DO DÍA:

- 1.- APROBACIÓN DAS ACTAS DO 08.07.19 E DO 31.07.19**
- 2.- DACIÓN DE CONTA DAS RESOLUCIÓNS DA ALCALDÍA (DA 584/19 Á 739/19)**
- 3.- DACIÓN DE CONTA DO INFORME DO CUMPRIMENTO DOS PRAZOS DAS OPERACIÓNS COMERCIAIS, 2º TRIMESTRE 2019**
- 4.- DITAME DA PROPOSTA DA ALCALDÍA DE ADHESIÓN Á INICIATIVA EUROPEA DO “PACTO DOS ALCALDES PARA O CLIMA E A ENERXÍA”**
- 5.- DITAME DA PROPOSTA DA ALCALDÍA DE APROBACIÓN DO PROXECTO MODIFICADO “ÁREA RECREATIVA HORTA DO CURA FASE I (POS+ADICIONAL 1/2019) E DESESTIMENTO DO PROXECTO “ÁREA RECREATIVA HORTA DO CURA FASE II (POS+2019 COMPLEMENTARIO)**
- 6.- DITAME DA MOCIÓN CONXUNTA DE SONDETEO, PSdeG-PSOE E PP DE TEO, DE APOIO Á CAMPAÑA #EmerxenciaFeminista PROMOVIDA POLAS ORGANIZACIÓNS DE MULLERES CON MOTIVO DA ACCIÓN PREVISTA PARA O 20 DE SETEMBRO DE 2019, EN TODO O PAÍS**
- 7.- DITAME DA MOCIÓN DO GRUPO MUNICIPAL DO BNG DE RECOÑECIMENTO ÁS MOBILIZACIÓNS DESENVOLVIDAS POLO FEMINISMO GALEGO**
- 8.- DITAME DA MOCIÓN DO BNG RELATIVA Á EMERXENCIA CLIMÁTICA E Á MOBILIZACIÓN DO 27 DE SETEMBRO POLO CLIMA**
- 9.- MOCIÓNS**
- 10.- ROGOS E PREGUNTAS**

Co quórum establecido polas disposicións legais vixentes para a válida constitución do Pleno, o sr. alcalde, sendo as vinte horas e cinco minutos, declara público e aberto o acto, pasando a tratar os asuntos incluídos na orde do día que figura na convocatoria, que son os seguintes:

1.- APROBACIÓN DAS ACTAS DO 08.07.19 E DO 31.07.19.

Acta da sesión extraordinaria do 8 de xullo de 2019.

O sr. alcalde pregúntalle aos/ás sres/as. concelleiros/as se desexan formular algunha observación á acta da sesión extraordinaria celebrada o 8 de xullo de 2019.

Non habendo observacións ao respecto, queda aprobada a acta citada.

Acta da sesión ordinaria do 31 de xullo de 2019.

O sr. alcalde pregúntalle aos/ás sres/as. concelleiros/as se desexan formular algunha observación á acta da sesión ordinaria celebrada o 31 de xullo de 2019.

Non habendo observacións ao respecto, queda aprobada a acta citada.

2.- DACIÓN DE CONTA DAS RESOLUCIÓNS DA ALCALDÍA (DA 584/19 Á 739/19).

Dáse conta das Resolucións da Alcaldía ditadas dende o día 25 de xullo ata o 20 de setembro de 2019, que comprenden os números 584 ao 739, indicando o sr. alcalde que están a disposición de todos os membros da Corporación para a súa consulta se así o desexan.

O Pleno da Corporación dáse por enterado.

3.- DACIÓN DE CONTA DO INFORME DO CUMPRIMENTO DOS PRAZOS DAS OPERACIÓNS COMERCIAIS, 2º TRIMESTRE 2019.

O sr. alcalde da conta do informe de Tesourería e Intervención, de 15 de xullo de 2019, sobre o cumprimento dos prazos de pago das operacións comerciais do 2º trimestre 2019.

O Pleno da Corporación dáse por enterado.

4.- DITAME DA PROPOSTA DA ALCALDÍA DE ADHESIÓN Á INICIATIVA EUROPEA DO “PACTO DOS ALCALDES PARA O CLIMA E A ENERXÍA”.

O sr. alcalde da conta da proposta de 13 de setembro de 2019, que se recolle a continuación, ditaminada favorablemente pola Comisión Informativa de persoal, comunicación, normalización lingüística, mocidade e medio natural de 19 de setembro de 2019.

“PROPOSTA DA ALCALDÍA

Adhesión á iniciativa europea do “Pacto dos alcaldes para o clima e a enerxía”

A Comisión Europea puxo en marcha en 2008 o Pacto dos Alcaldes (Covenant of Mayors), unha iniciativa aberta a todas as cidades e municipios en Europa co obxectivo de involucrar ás autoridades locais e aos cidadáns no desenvolvemento e a aplicación da política enerxética da Unión Europea. O Pacto consiste no compromiso das cidades asinantes de ir máis alá dos obxectivos adoptados para o ano 2020 pola UE para reducir as emisións de CO2 a través de medidas de eficiencia enerxética, de accións relacionadas coa promoción das enerxías renovables e da mobilidade urbana sostible. A adhesión a esta iniciativa, supoñía acollerse ao denominado obxectivo 20/20/20, cuxa meta era aumentar a eficiencia enerxética un 20%, aumentar o uso de enerxía procedente de fontes renovables outro 20% e reducir as emisións de gases de efecto invernadoiro (GEI) un 20% para o ano 2020.

A partir do éxito do Pacto dos Alcaldes, en 2014 lanzouse a iniciativa Mayors´ Adapt, baseada no mesmo modelo de xestión pública, mediante a que se invitaba ás cidades a asumir compromisos políticos e tomar medidas para anticiparse aos efectos inevitables do cambio climático.

O 15 de outubro de 2015, a Comisión Europea lanzou o Pacto dos Alcaldes para o Clima e a Enerxía (Covenant of Mayors for Climate & Energy), fusionando as iniciativas anteriores. Esta nova ferramenta pretende reunir aos alcaldes/alcaldesas das cidades europeas nunha rede permanente de intercambio de información para a aplicación de boas prácticas: mellorar a eficiencia enerxética no ámbito urbano, conseguir unha redución das emisións de CO₂ no ámbito territorial local e aumentar a resiliencia fronte ao cambio climático.

Para alcanzar estes obxectivos, os municipios adheridos ao Pacto comprométense a redactar un Plan de Acción para a Enerxía Sostible e o Clima (PACES), nun prazo máximo de dous anos dende a data de adhesión. O PACES inclúe:

- 1) un inventario de referencia de emisións (IRE) para facer o seguimento da súa efectividade das accións de mitigación;
- 2) unha avaliación de riscos e vulnerabilidades ante o cambio climático;

Ademais, cada dous anos deberase presentar un informe de seguimento do PACES.

O “Pacto dos Alcaldes para o Clima e a Enerxía” consiste no compromiso dos concellos signatarios de facer propios os obxectivos da Unión Europea para o ano 2030 e reducir as emisións de CO₂ no seu territorio en, polo menos, o 40% a través de medidas de eficiencia enerxética e dun maior uso de fontes de enerxía renovable, traballando á súa vez na implantación de medidas de adaptación ao cambio climático e aumento da resiliencia fronte a este, así como un aumento da cooperación coas autoridades locais e rexionais similares na UE e fóra dela para mellorar o acceso á enerxía segura, sostible e alcanzable.

Sectores como os municipais, residenciais e terciarios, e o transporte, considéranse sectores clave para a mitigación. As autoridades locais deberán concentrar os seus esforzos en reducir a demanda de enerxía nos seus territorios e adaptar a demanda enerxética á oferta promovendo a utilización de recursos enerxéticos locais.

A Xunta de Galicia, consciente de que o Pacto dos Alcaldes polo Clima e a Enerxía e o mellor instrumento para implicar aos concellos de Galicia na loita contra o cambio climático, decidiu participar nesta iniciativa como coordinador do pacto na Comunidade Autónoma de Galicia, co obxectivo de promover e apoiar aos concellos de Galicia na

súa adhesión ao pacto e conseguir que no ano 2020 haxa, a lo menos, 100 concellos galegos adheridos ao Pacto, e estean todos os concellos de mais de 20.000 habitantes.

Coñecedores da importancia das accións locais na mitigación do cambio climático, recoñecemos que o noso compromiso esixe:

Unha acción política decidida:

Definir obxectos ambiciosos a longo prazo, máis alá dos mandatos políticos.

Unha interacción coordinada entre a mitigación e a adaptación a través da mobilización de todas as áreas municipais implicadas;

Un enfoque territorial integral e intersectorial.

A asignación dos recursos humanos, técnicos e financeiros axeitados:

- O compromiso de todas as partes implicadas nos nosos territorios.
- O empoderamento dos cidadáns como consumidores proactivos “prosumers” e participantes nun sistema enerxético responsable e sensible á demanda.

Accións inmediatas, medidas flexibles e efectivas para agora e para o futuro, “non regresivas”.

A implantación de solucións intelixentes para facer fronte aos retos sociais e técnicos da transición enerxética.

Revisar periodicamente ns nosas accións conforme aos controis e as avaliacións dos resultados.

Valorando estes aspectos, propoñemos á corporación municipal de Teo sumarse ao PACTO DOS ALCALDES PARA O CLIMA E A ENERXÍA e apoiar esta iniciativa necesaria para conseguir a sustentabilidade enerxética e a adaptación ao cambio climático do noso Concello. Os compromisos que asumimos concrétanse en:

1. Reducir as emisións de CO₂ no noso territorio en ao menos un 40 por cento ata 2030 mediante o aumento da eficiencia enerxética e un maior uso de fontes de enerxía renovables.
2. Traballar na promoción de medidas para a adaptación ao cambio climático mediante a creación de plans de acción en favor da enerxía sustentable e o aumento da resiliencia fronte ao cambio climático.
3. Elaborar un Inventario de Emisións de Referencia e unha avaliación de riscos e vulnerabilidades derivados do Cambio Climático, como base para o Plan de Acción

para o Clima e a Enerxía Sustentable (PACES) no que se resuman as accións clave que planean levar a cabo.

4. Presentar o Plan de Acción para o Clima e a Enerxía Sustentable no prazo de 2 anos a partir da sinatura oficial do Pacto dos Alcaldes para a supervisión e verificación do proceso.
5. Desenvolvido o Plan de Acción, elaborar un informe bianual para a avaliación, control e verificación dos obxectivos, informando dos fitos acadados en cumprimento do Plan.
6. Compartir a nosa visión, resultados, experiencia e coñecemento con outras autoridades locais e rexionais da Unión Europea.
7. Adaptar as estruturas do Concello incluíndo a asignación de suficientes recursos humanos para o desenvolvemento das accións necesarias.
8. Mobilizar á sociedade civil no noso ámbito para que participe no desenvolvemento do Plan de Acción.
9. Comunicar os presentes acordos á Dirección Xeral de Calidade Ambiental e Cambio Climático da Consellería de Medio Ambiente e Ordenación do Territorio para facer posible as tarefas de apoio e coordinación.

En consecuencia, propónse ao Pleno da Corporación municipal de Teo aprobar o seguinte ACORDO:

- A adhesión do Concello de Teo ao Pacto dos Alcaldes para o Clima e a Enerxía, promovido pola Unión Europea.
- Facultar ao Alcalde de Teo para representar ao Concello na sinatura do Pacto de Alcaldes e en calquera outras actuacións que requira a súa execución”.

Aberta a primeira quenda de intervencións, intervén o portavoz do BNG, sr. Fernández, para indicar que o seu grupo está de acordo pois todo o que se faga neste sentido é positivo, e que votarán a favor.

Intervén o portavoz do BNG, sr. Fernández, para indicar que o seu grupo está de acordo e que votarán a favor.

A portavoz do PSdeG-PSOE, sra. Lemus, e o portavoz do PP, sr. Guerra non fan uso da súa quenda de intervención.

Rematado o debate e sometido o asunto a votación, o Pleno da Corporación, por unanimidade dos presentes (4 Son de Teo, 4 PSdeG-PSOE, 7 PP e 2 BNG), acorda:

- A adhesión do Concello de Teo ao Pacto dos Alcaldes para o Clima e a Enerxía, promovido pola Unión Europea.
- Facultar ao Alcalde de Teo para representar ao Concello na sinatura do Pacto de Alcaldes e en calquera outras actuacións que requira a súa execución.

5.- DITAME DA PROPOSTA DA ALCALDÍA DE APROBACIÓN DO PROXECTO MODIFICADO “ÁREA RECREATIVA HORTA DO CURA FASE I (POS+ADICIONAL 1/2019) E DESESTIMENTO DO PROXECTO “ÁREA RECREATIVA HORTA DO CURA FASE II (POS+2019 COMPLEMENTARIO).

O sr. alcalde cede a palabra á concelleira de urbanismo, seguridade cidadá, enerxía e sostibilidade, D.^a Uxía Lemus de la Iglesia.

A sra. Lemus da conta da proposta da alcaldía de 4 de setembro de 2019, que se recolle a continuación, ditaminada favorablemente pola Comisión Informativa de urbanismo, infraestruturas, sostibilidade e servizos básicos de 19 de setembro de 2019.

“PROPOSTA DA ALCALDÍA

Asunto: aprobación de proxecto modificado “Area Recreativa Horta do Cura Fase I” (POS+ Adicional 1/2019) e desestimento do proxecto “Area Recreativa Horta do Cura Fase II (POS+2019 complementario)

Considerando que o Pleno da Corporación, na sesión ordinaria de 18 de decembro de 2018, acordou aprobar o Plan de cooperación ás obras e servizos de competencia municipal (Plan único de concellos) “POS + 2019”, e así mesmo acordou aprobar o plan complementario.

Vista a circular remitida pola Deputación Provincial sobre a elaboración do POS + ADICIONAL 1/2019 por maior achega desa Deputación, de data 30/04/2019, e considerando que segundo a mesma a cantidade que definitivamente lle corresponde ao Concello de Teo no POS + ADICIONAL 1/2019 ascende a 621.616,76 euros.

Tendo en conta que por Resolución de Alcaldía de data 6 de maio de 2019 (rectificada mediante Resolución de Alcaldía de 10 de maio de 2019 (res 343/19)), acordouse participar na 1ª Fase do Plan provincial de cooperación ás obras e servizos de competencia municipal (Plan único de concellos) POS+ Adicional 1/2019 da Deputación Provincial da Coruña, confirmando a aplicación da maior achega provincial asignada ao financiamento dos investimentos financeiramente sostibles que xa tiña incluídos no Plan Complementario ao POS+ 2019, no que se incluía o investimento denominado “AREA RECREATIVA HORTA DO CURA FASE I”, cun importe de proxecto de 439.998,88 euros.

Tendo en conta que dito proxecto foi informado desfavorablemente pola Dirección Xeral de Patrimonio Cultural en data 25/02/2019, solicitando se emendase a documentación presentada, remitindo o Concello dita documentación en resposta ao requirido en data 05/07/2019.

Logo de ver a resolución da Dirección Xeral de Patrimonio Cultural de data 23 de agosto de 2019, relativa á solicitude de autorización de obras na Area Recreativa Horta do Cura, de data 23/08/2019 (rex. entrada nº 5256, de 26/08/2019), na que se autorizan as obras da área recreativa solicitadas.

Por outro lado, logo de ver que no plan complementario ao POS+ 2019, estaba incluído o seguinte investimento “AREA RECREATIVA HORTA DO CURA FASE II”, cun importe de 149.774,67 euros.

Tendo en conta que a resolución de 24 de maio de 2019 de concesión das subvencións destinadas á creación ou mellora de infraestruturas nos concellos de Galicia con poboación inferior a 50.000 habitantes para o ano 2019, convocadas pola Orde do 21 de decembro de 2018, da Dirección Xeral de Ordenación do Territorio e Urbanismo, da Consellería de Medio Ambiente, Territorio e Vivenda, pola que concede unha subvención ao investimento “Area Recreativa Horta do Cura, fase II”, por un importe de 96.800 euros, o 64,6304% do total do proxecto.

Tomando en consideración estes antecedentes, propónse ao Pleno Municipal a adopción do seguinte acordo:

Primeiro.- Aprobar o proxecto modificado da obra “AREA RECREATIVA HORTA DO CURA FASE I”, de data xullo de 2019, incluída no POS + Adicional 1/2019.

Segundo.- Desistir da inclusión do investimento “AREA RECREATIVA HORTA DO CURA FASE II” no Plan Complementario do POS+2019, debido á obtención dunha subvención autonómica para a súa execución.

Terceiro.- Remitir este acordo á Deputación Provincial para a súa incorporación ao expediente”.

Aberta a primeira quenda de intervencións, o portavoz do BNG, sr. Fernández, e o portavoz do PP, sr. Guerra, non fan uso da súa quenda de intervencións.

Rematado o debate e sometido o asunto a votación, o Pleno da Corporación, con dez votos a favor (4 Son de Teo, 4 PSdeG-PSOE e 2 BNG) e sete abstencións (7 PP), acorda:

Primeiro.- Aprobar o proxecto modificado da obra “AREA RECREATIVA HORTA DO CURA FASE I”, de data xullo de 2019, incluída no POS + Adicional 1/2019.

Segundo.- Desistir da inclusión do investimento “AREA RECREATIVA HORTA DO CURA FASE II” no Plan Complementario do POS+2019, debido á obtención dunha subvención autonómica para a súa execución.

Terceiro.- Remitir este acordo á Deputación Provincial para a súa incorporación ao expediente.

6.- DITAME DA MOCIÓN CONXUNTA DE SONDETEO, PSdeG-PSOE E PP DE TEO, DE APOIO Á CAMPAÑA #EmerxenciaFeminista PROMOVIDA POLAS ORGANIZACIÓNS DE MULLERES CON MOTIVO DA ACCIÓN PREVISTA PARA O 20 DE SETEMBRO DE 2019, EN TODO O PAÍS.

O sr. alcalde cede a palabra á concelleira de mobilidade, comercio, turismo, emprego e igualdade, D.^a Iria Otero Romero.

A sra. Otero da conta da moción conxunta de Son de Teo, PSdeG-PSOE e PP de Teo, que se recolle a continuación, ditaminada favorablemente pola Comisión Informativa de benestar social, igualdade, transportes, turismo, comercio e emprego de 19 de setembro de 2019.

“MOCION CONXUNTA DE SONDETEO, PsdeG-PSOE E PP DE TEO, DE APOIO Á CAMPAÑA #EmerxenciaFeminista PROMOVIDA POLAS ORGANIZACIÓNS DE MULLERES CON MOTIVO DA ACCIÓN PREVISTA PARA O 20 DE SETEMBRO DE 2019, EN TODO O PAÍS.

Ao amparo do disposto no artigo 97.2 do Regulamento de Organización, funcionamento e Réxime Xurídico das Entidades Locais, aprobado por RD 2569/86 do 28 de Novembro, o Grupos Municipais asinantes presentan para o seu debate e posterior aprobación, se procede, a proposición sobre “Apoio á campaña #EmerxenciaFeminista promovida en Galicia, entre outras, polas organizacións de mulleres: Federación de Asociacións de Mulleres Rurais de Galicia, Rede Galega pola Igualdade, Asociación Profesional de Axentes de Igualdade de Oportunidades Galega, Sociedade Galega de Sexoloxía, soño de Lith, Teenses pola igualdade, Foro feminista Maruxa Mallo, Asociación Viúvas Demócratas de Vigo, Colectivo Feminista Pontevedra, Rede de Mulleres Veciñais Contra os Malos Tratos de Vigo, así como a agrupación Comando Igualdade, e outras que se poderán ir sumando; todas elas en repulsa contra os asasinatos de mulleres e a violencia machista”,

EXPOSICIÓN DE MOTIVOS

O verán de 2019, será recordado como un verán negro.

Os telexornais échense de asasinatos machistas, os seus titulares din que aparecemos mortas, non señores, estannos asasinando.

O pasado mes de xullo, cada dous días, unha muller foi asasinada. Isto xa non é unha alerta, declaramos a emerxencia feminista. Pais que asasinan aos seu fillos e fillas para causar o maior dos sufrimentos. Pederastia, trata, desaparicións, asasinatos, chantaxes, extorsión, ameazas, acoso, agresións, abusos, manadas, violacións están á orde do día. Unha xustiza que non é xusta, poñendo en dúbida a declaración das vítimas. Sentencias sen sentido que nos manda a mensaxe alta e clara de que “o teu corpo non te pertence, a túa vida non te pertence”.

E seguimos, seguimos como si se puidese continuar. Seguimos porque están acostumbrados á nosa xustiza, están acostumbrados á violencia, están acostumbrados a tratarnos coma cidadáns de segunda, acostumbrados aos nosos corpos sen vida. Para vos “estas cousas pasan e pasaron sempre”. Seguimos neste estado de guerra inadmisibile nun estado democrático.

Non hai tempo, paremos o mundo, non se pode seguir normalizando esta situación, non se pode seguir condenando ás mulleres a convivir co terrorismo machista. Un terror que se mete en cada recuncho do noso día a día, coa dúbida constante de quen será a seguinte.

Fáltannos as máis de mil mulleres asasinadas dende o 2003, fáltannos todas as que non foron contadas, todas as que xa non están. So no mes de xullo 13 mulleres e unha menor foron asasinadas.

Basta de mirar cara outro lado, da falta de compromiso, dos erros que se permiten. Esiximos responsabilidade e maior compromiso de a tódalas institucións do noso Estado de Dereito.

Por todo o anterior, SOLICITAMOS A ADOPCIÓN DO SEGUINTE ACORDO:

PRIMEIRO E ÚNICO: Apoio desta corporación municipal á campaña #EmerxenciaFeminista, convocada polas organizacións feministas e a colaboración coas entidades convocantes, a través do medios dos que dispón o concello mediante as seguintes accións:

A. Iluminar de violeta a noite do 20 de setembro a fachada do Concello ou a zona onde se realice a concentración convocada polas organizacións como mostra do compromiso na loita contra a violencia machista, así como prestar o apoio e soporte preciso para a organización da concentración/manifestación e que lle poida ser solicitada polas organizacións convocantes.

B. Pronunciamento público da corporación municipal contra os asasinatos machistas e contra toda forma de violencia contra as mulleres, contra a normalización da mesma, e contra a apatía e a indiferenza.

C. Posicionamento da corporación contra todas aquelas medidas, campañas e mensaxes que contribúan á xustificación da violencia de xénero, que promovan a súa minusvaloración ou cuestionamento así como das ferramentas normativas das que nos temos dotado para combatela. Non podemos permitir que teñan un espazo de poder quen non recoñece a violencia de xénero como un problema social, contra o que hai que loitar sen descanso dende tódalas instancias: iso é terrorismo de estado”.

Aberta a primeira quenda de intervencións, o portavoz do BNG, sr. Fernández cede a palabra á concelleira do seu grupo, sra. Diéguez, que sinala que están a favor, pero consideran que só con xestos non se elimina esta lacra, e por iso presentan unha moción que vai máis alá.

A portavoz do PSdG-PSOE, sra. Lemus, e o portavoz do PP, sr. Guerra non fan uso da quenda de intervencións.

Rematado o debate e sometido o asunto a votación, o Pleno da Corporación, por unanimidade dos presentes (4 Son de Teo, 4 PSdeG-PSOE, 7 PP e 2 BNG), acorda:

Apoio desta corporación municipal á campaña #EmerxenciaFeminista, convocada polas organizacións feministas e a colaboración coas entidades convocantes, a través do medios dos que dispón o concello mediante as seguintes accións:

A. Iluminar de violeta a noite do 20 de setembro a fachada do Concello ou a zona onde se realice a concentración convocada polas organizacións como mostra do compromiso na loita contra a violencia machista, así como prestar o apoio e soporte preciso para a organización da concentración/manifestación e que lle poida ser solicitada polas organizacións convocantes.

B. Pronunciamento público da corporación municipal contra os asasinatos machistas e contra toda forma de violencia contra as mulleres, contra a normalización da mesma, e contra a apatía e a indiferenza.

C. Posicionamento da corporación contra todas aquelas medidas, campañas e mensaxes que contribúan á xustificación da violencia de xénero, que promovan a súa minusvaloración ou cuestionamento así como das ferramentas normativas das que nos temos dotado para combatela. Non podemos permitir que teñan un espazo de poder quen non reconece a violencia de xénero como un problema social, contra o que hai que loitar sen descanso dende tódalas instancias: iso é terrorismo de estado.

7.- DITAME DA MOCIÓN DO GRUPO MUNICIPAL DO BNG DE RECOÑECIMENTO ÁS MOBILIZACIÓNS DESENVOLVIDAS POLO FEMINISMO GALEGO.

O sr. alcalde cede a palabra ao portavoz do BNG, D. Manuel A. Fernández Baz, que cede a palabra á concelleira do seu grupo, Dña. Carmen Diéguez, quen da conta da moción do seu grupo (rex. entrada nº 6105, de 10/09/2019), que se recolle a continuación, ditaminada favorablemente pola Comisión Informativa de benestar social, igualdade, transportes, turismo, comercio e emprego de 19 de setembro de 2019.

“O grupo municipal do **BLOQUE NACIONALISTA GALEGO** no Concello de Teo, ao abeiro do Regulamento orgánico municipal do Pleno da Corporación, presenta a seguinte **MOCIÓN** para o seu debate en Pleno.

EXPOSICIÓN DE MOTIVOS

O pasado mes de marzo de 2019 o feminismo galego volveu facer historia cunha folga e unha serie de mobilizacións previas que superaron a asistencia e expectativas xeradas após a tamén histórica xornada do 8 de marzo de 2018. Porén, a resposta esixida nas rúas non ten chegado na parte que compete ás administracións públicas e é preciso tomar conciencia da necesidade de incrementar os esforzos a realizar.

Recentemente Galiza, e tamén outros pobos do Estado español, volvían vivir asasinatos machistas que fixeron saltar a alarma social pero que, porén, unha vez máis, non mereceron comparecencias específicas dos gobernos como si o fixeron outros asuntos. No mes de xullo, galegas e galegos volvíamos saír ás rúas para condenar un novo feminicidio en Galiza, no concello de Vilalba. Cómpre recordar tamén que este

último asasinato tiña lugar despois de que unha orde de afastamento fora quebrantada, o que nos recorda a necesidade imperiosa de mellorar os mecanismos de protección existentes e de mellorar e aumentar os recursos existentes.

A estes feitos únense unha longa lista de acontecementos recentes que non son unha excepción, senón que son habituais na nosa realidade máis achegada, e que nos recordan a necesidade de apostar por máis medidas para unha transformación social urxente que debilite o sistema patriarcal que nos violenta e asasina. Recordamos, por exemplo, novos concursos sexistas que tiveron que ser cancelados por presión social, denuncias por agresións sexuais en festas e festivais, agresións verbais aos puntos lilás de moitos eventos, sentenzas patriarcalas, puntos de encontro con condicións inadecuadas e, unha vez máis, pechados no mes de agosto ou problemas coa rede de casas de acollida ao tempo que o tan publicitado Pacto de Estado é un titular máis do que unha realidade (sen supoñer aínda un só cambio legal relevante para as mulleres galegas) e o cumprimento da Lei galega de 2007 está a ser sistematicamente vulnerado en cuestións tan importantes como a atención psicolóxica dentro da Atención Primaria.

Son moitos os sinais de alerta dunha situación insoportábel e que non se arranxa con medidas cosméticas como posicionamentos puntuais nas efemérides ou xestos exclusivamente simbólicos e baleiros de contido e compromiso. As administracións teñen unha responsabilidade que debe cumprirse, corrixir o que non funciona e incrementar as actuacións.

Por todo isto, o grupo municipal do BNG solicita do Pleno da Corporación Municipal a adopción do seguinte acordo:

1. Expresar o recoñecemento da Corporación ás mobilizacións desenvolvidas polo feminismo galego.

2. Comprometerse a incrementar os recursos económicos destinados á prevención e loita contra a violencia machista no vindeiro exercicio económico.

3. Demandar do goberno central:

- a) o incremento cando menos no dobre as contías destinadas á administración local para o vindeiro exercicio económico, procurando os mecanismos legais oportunos para garantilos con independencia da situación política estatal e da existencia ou non de

novos orzamentos

b) a reformulación dos criterios de reparto para que se teñan en conta as especificidades do noso país como son a dispersión, o alto número de entidades de poboación e o avellentamento para que Galiza deixe de estar discriminada a ese respecto.

c) impulsar as medidas oportunas para deixar de incumprir o Convenio do Consello de Europa sobre prevención e loita contra a violencia contra a muller e a violencia doméstica (Convenio de Istambul)

3. Demandar da Xunta de Galiza:

a) Un incremento substancial dos recursos económicos destinados especificamente a loitar contra a violencia de xénero que, como mínimo, deben situarse no 1% dos orzamentos da Xunta de Galiza para o ano 2020.

b) Deixar de incumprir a Lei 11/2007, do 27 de xullo, galega para a prevención e o tratamento integral da violencia de xénero comprometendo os recursos persoais e económicos necesarios para paliar os efectos negativos do seu incumprimento e da política económica aplicada durante a década Feijó”.

A portavoz do PSdeG-PSOE, sra. Lemus, non fai uso da súa quenda de intervención.

Intervén o portavoz do PP, sr. Guerra, quen lle cede a palabra á concelleira do seu grupo D.^a María Vázquez Rey, que sinala que o seu grupo se vai abster, pero que nunca irán en contra porque consideran que hai que seguir a traballar nesta liña.

O sr. Alcalde da a palabra á concelleira do seu grupo D.^a Iria Otero Romero, que sinala que van votar a favor.

Nos se fai uso da segunda quenda de intervencións.

Rematado o debate e sometido o asunto a votación, o Pleno da Corporación, con dez votos a favor (4 Son de Teo, 4 PSdeG-PSOE e 2 BNG) e sete abstencións (7 PP), acorda:

1. Expresar o recoñecemento da Corporación ás mobilizacións desenvolvidas polo feminismo galego.

2. Comprometerse a incrementar os recursos económicos destinados á prevención e loita contra a violencia machista no vindeiro exercicio económico.

3. Demandar do goberno central:

a) o incremento cando menos no dobre as contías destinadas á administración local para o vindeiro exercicio económico, procurando os mecanismos legais oportunos para garantilos con independencia da situación política estatal e da existencia ou non de novos orzamentos

b) a reformulación dos criterios de reparto para que se teñan en conta as especificidades do noso país como son a dispersión, o alto número de entidades de poboación e o avellentamento para que Galiza deixe de estar discriminada a ese respecto.

c) impulsar as medidas oportunas para deixar de incumprir o Convenio do Consello de Europa sobre prevención e loita contra a violencia contra a muller e a violencia doméstica (Convenio de Istambul)

3. Demandar da Xunta de Galiza:

a) Un incremento substancial dos recursos económicos destinados especificamente a loitar contra a violencia de xénero que, como mínimo, deben situarse no 1% dos orzamentos da Xunta de Galiza para o ano 2020.

b) Deixar de incumprir a Lei 11/2007, do 27 de xullo, galega para a prevención e o tratamento integral da violencia de xénero comprometendo os recursos persoais e económicos necesarios para paliar os efectos negativos do seu incumprimento e da política económica aplicada durante a década Feijóo.

8.- DITAME DA MOCIÓN DO BNG RELATIVA Á EMERXENCIA CLIMÁTICA E Á MOBILIZACIÓN DO 27 DE SETEMBRO POLO CLIMA.

O sr. alcalde cede a palabra ao portavoz do BNG, D. Manuel A. Fernández Baz.

O sr. Fernández da conta da moción do seu grupo (rex. entrada nº 6106, de 10/09/2019), que se recolle a continuación, ditaminada favorablemente pola Comisión Informativa de persoal, comunicación, normalización lingüística, mocidade e medio natural de 19 de setembro de 2019.

“O grupo municipal do **BLOQUE NACIONALISTA GALEGO** no Concello de Teo, ao abeiro do Regulamento orgánico municipal do Pleno da Corporación, presenta a seguinte **MOCIÓN** para o seu debate en Pleno, relativa á emerxencia climática e á mobilización do 27 de setembro polo clima.

EXPOSICIÓN DE MOTIVOS

1. O vindeiro venres 27 de setembro está convocada unha mobilización mundial en defensa do planeta e para facerlle fronte ás ameazas e riscos derivados da chamada “crise do clima”. Trátase dunha chamada de atención diante do inexorábel “cambio climático” e da incapacidade de organismos internacionais e grandes corporacións para facerlles fronte.

A proba máis evidente desta crise son os recentes informes de dous organismos internacionais dependentes das Nacións Unidas: o Panel Intergubernamental sobre o Cambio Climático (IPCC) e a Plataforma Intergubernamental de Biodiversidade e Servizos Ecosistémicos (IPBES). Estes informes fixeron saltar as alarmas sobre a catástrofe ambiental e humana a que está abocada o planeta se non se produce un drástico cambio de rumbo, xa que non se están cumprindo os obxectivos marcados nos sucesivos cumios do clima e os acordos internacionais ao respecto.

Non é tempo pois de “bágoas de crocodilo” nin de declaracións para a galería. É tempo de actuar, e de facelo con determinación. Cómpre aprobar un plan de acción que vaia ás causas do problema, non que simplemente minimize, atenúe e atrase as súas gravísimas consecuencias.

2. Dada a magnitude e as graves consecuencias que está a ter xa a “emerxencia

climática”, consideramos necesario enfrontala desde unha tripla dimensión: a global, a galega e a local.

En primeiro lugar, nunha perspectiva global, cómpre denunciar o interese en poñer o foco de atención nas consecuencias da crise climática (incremento das temperaturas, seca, escaseza de recursos, destrución da biodiversidade, ameazas para a saúde) e non nas súas causas: sistema económico capitalista depredador de recursos, xerador de relacións inxustas e de graves agresións ás persoas, aos pobos e aos ecosistemas... Cómpre polo tanto denunciar as consecuencias da actual fase do capitalismo e explicar a crise climática nese contexto, poñendo en relación as agresións ao medio coas desigualdades económicas e sociais e as opresións nacionais e de clase.

En segundo termo, desde unha perspectiva galega é necesario ter en conta o papel de Galiza na economía estatal e mundial como fornecedora de materias primas, mediante o desenvolvemento de actividades extractivas e depredadoras que teñen altos custos ambientais e escasos beneficios sociais e para o país no seu conxunto. En consecuencia, débese situar no centro do debate as consecuencias para o clima, para a saúde, para a cohesión social e territorial e para o benestar colectivo das actividades extractivas de sectores como o enerxético, industrial, forestal, megamineiro, a mobilidade, o ciclo da auga, a xeración e xestión dos residuos, os macrocentros comerciais... defendendo un modelo alternativo que poña o relevo na sustentabilidade, na xustiza social, no equilibrio ambiental e no beneficio colectivo para o noso país.

En terceiro lugar, é necesario considerar como afecta a emerxencia climática no ámbito local e as medidas que poden desenvolver os concellos e deputación, no seu ámbito de competencia, para facerlle fronte a este desafío, mediante a redución da pegada ecolóxica con actuacións no ámbito do urbanismo, a mobilidade, a enerxía, a xestión dos residuos, a xestión do ciclo da auga, ou a aposta por un desenvolvemento económico máis sustentábel e máis xusto que fomente os recursos propios, as cadeas de valor e o comercio de proximidade.

3. O debate sobre a emerxencia climática é un terreo cheo de trampas, cheo de declaracións para a galería, de boas intencións e de posturas cosméticas. Todo o mundo se apunta á moda do verde, do sustentábel, da economía circular, mesmo aqueles gobernos e grandes corporacións que traballan xusto no sentido contrario e que son os principais responsábeis da crise do clima. Por iso precisamos menos declaracións e máis

actuacións, menos posturo e máis medidas efectivas para cambiar o rumbo dun mundo que vai camiño da catástrofe.

Polo anteriormente exposto, o BNG presenta a seguinte Moción para o debate no Pleno.

1. Apoiar a mobilización mundial en defensa do clima do 27 de setembro e organizar actividades dirixidas á sensibilización da poboación sobre as causas e consecuencias da emerxencia climática.
2. Denunciar a responsabilidade dos gobernos, especialmente os dos países desenvolvidos, e das grandes corporacións na actual crise climática, e esixir ao Estado español e á UE que desenvolva medidas eficaces para facerlle fronte ás causas deste grave problema, que teñen que ver con un sistema económico depredador de recursos, xerador de relacións inxustas e de graves agresións ás persoas, aos pobos e aos ecosistemas.
3. Reclamar ao goberno da Xunta de Galiza que desenvolva un marco lexislativo e estratexias concertadas con todos os axentes económicos, sociais e institucionais para loitar eficazmente contra as causas da emerxencia climática, mudando de raíz as súas políticas en relación coa ordenación do territorio, a protección da paisaxe e dos ecosistemas, a mobilidade, a xestión dos residuos, a enerxía, a minaría, a xestión da auga e en xeral as políticas económicas que fomentan a depredación dos recursos, a despoboación e o empobrecemento.
4. Impulsar/seguir impulsando actuacións encamiñadas a minguar a pegada ecolóxica no seu ámbito xeográfico desenvolvendo as seguintes medidas no período 2019-2023:
 - Aposta por fontes de enerxías renovábeis no abastecemento, polo aforro e a eficiencia no consumo, e por un modelo enerxético sustentábel, xusto, accesíbel para os sectores máis desfavorecidos e que estea ao servizo do desenvolvemento das comunidades locais e da economía galega.
 - Desenvolvemento dun modelo de mobilidade sustentábel, saudábel e seguro, que potencie a mobilidade natural (a pé, en bici) e o transporte colectivo, e que restrinja ao estritamente necesario a uso dos vehículos privados a motor.
 - Desenvolvemento de modelos urbanos compactos, accesíbeis, amábeis e integradores, que favorezan a cohesión social, a creación de espazos públicos e zonas verdes seguras e accesíbeis, o dinamismo social e a actividade económica e comercial de proximidade.

- Desenvolvemento de sistemas de xestión de residuos que promovan a redución, que fomenten a reutilización e que establezan o tratamento de proximidade dos biorresiduos primando a compostaxe domiciliaria e comunitaria. Demanda da implantación de sistemas de depósito, devolución e retorno para envases e embalaxes.
 - Implantación de sistemas de xestión pública do ciclo da auga que prioricen o aforro, a reutilización, a eficiencia das redes de distribución e tratamento, e a sensibilización social sobre o uso sustentábel da auga. Apoio a sistemas de xestión comunitaria da auga que primen o aforro, a eficiencia das redes de distribución, o consumo responsábel e a reutilización dos recursos.
 - Fomento da produción e o consumo de proximidade, potenciando iniciativas de produción e comercialización de produtos locais.
 - Potenciar os espazos naturais protexidos e a súa conectividade e impulsar iniciativas de posta en valor do monte apostando pola multifuncionalidade e a limitación das especies forestais como o eucalipto que degradan e empobrecen os ecosistemas.
5. Creación dun comité ou gabinete de acción contra a emerxencia climática, en coordinación con outras instancias institucionais. O obxectivo deste comité é analizar, propoñer e coordinar todas as actuacións da institución para facerlle fronte á crise climática tendo en conta as competencias na materia, que poderán ter a condición de Plan Director ou Plan Estratéxico fronte á emerxencia climática. A súa elaboración, desenvolvemento, seguimento e avaliación farase coa máxima participación social, coa necesaria perspectiva de xénero e con criterios de transparencia”.

Aberta a primeira quenda de intervencións, a portavoz do PSdeG-PSOE, sra. Lemus, expón que coa aclaración do punto cinco parécelle correcto e axeitado, e que apoian a moción.

Intervén o portavoz do PP, sr. Guerra, quen lle cede a palabra á concelleira do seu grupo D.^a Dolores Nariño, que expón que lle parece unha boa idea, pero que poderían delimitar un pouco máis certos aspectos, concretamente pregúntase que tipo de medidas se prantexan co fomento da produción e consumo de proximidade, e como se enfocarían esas medidas.

A sra. Otero, concelleira de Son de Teo, apunta que no punto cinco poderíase engadir o “Comité de acción municipal de emerxencia climática”.

O sr. Alcalde concede a palabra ao o portavoz do BNG, sr. Fernández, para que resposte ás preguntas que lle prantexan, indicando este que o nome que se poña non é un problema. En canto á pregunta realizada pola sra. Nariño resposta que sempre é mellor mercar produtos de proximidade, temos o mercado labrego e campañas polo comercio local, mercando en proximidade axudamos a reducir as emisións de CO2 que produce o transporte. Pero hai tendencia a deixar de producir, de xeito que si tivesemos unha crise climática grave, tamén teríamos un grave problema, xa que todos os produtos virían de fora.

Rematado o debate e sometido o asunto a votación, o Pleno da Corporación, con dez votos a favor (4 Son de Teo, 4 PSdeG-PSOE e 2 BNG) e sete abstencións (7 PP), acorda:

- 1. Apoiar a mobilización mundial en defensa do clima do 27 de setembro e organizar actividades dirixidas á sensibilización da poboación sobre as causas e consecuencias da emerxencia climática.**
- 2. Denunciar a responsabilidade dos gobernos, especialmente os dos países desenvolvidos, e das grandes corporacións na actual crise climática, e esixir ao Estado español e á UE que desenvolva medidas eficaces para facerlle fronte ás causas deste grave problema, que teñen que ver con un sistema económico depredador de recursos, xerador de relacións inxustas e de graves agresións ás persoas, aos pobos e aos ecosistemas.**
- 3. Reclamar ao goberno da Xunta de Galiza que desenvolva un marco lexislativo e estratexias concertadas con todos os axentes económicos, sociais e institucionais para loitar eficazmente contra as causas da emerxencia climática, mudando de raíz as súas políticas en relación coa ordenación do territorio, a protección da paisaxe e dos ecosistemas, a mobilidade, a xestión dos residuos, a enerxía, a minaría, a xestión da auga e en xeral as políticas económicas que fomentan a depredación dos recursos, a despoboación e o empobrecemento.**
- 4. Impulsar/seguir impulsando actuacións encamiñadas a minguar a pegada**

ecolóxica no seu ámbito xeográfico desenvolvendo as seguintes medidas no período 2019-2023:

- **Aposta por fontes de enerxías renovábeis no abastecemento, polo aforro e a eficiencia no consumo, e por un modelo enerxético sustentábel, xusto, accesíbel para os sectores máis desfavorecidos e que estea ao servizo do desenvolvemento das comunidades locais e da economía galega.**
- **Desenvolvemento dun modelo de mobilidade sustentábel, saudábel e seguro, que potencie a mobilidade natural (a pé, en bici) e o transporte colectivo, e que restrinxa ao estritamente necesario a uso dos vehículos privados a motor.**
- **Desenvolvemento de modelos urbanos compactos, accesíbeis, amábeis e integradores, que favorezan a cohesión social, a creación de espazos públicos e zonas verdes seguras e accesíbeis, o dinamismo social e a actividade económica e comercial de proximidade.**
- **Desenvolvemento de sistemas de xestión de residuos que promovan a redución, que fomenten a reutilización e que establezan o tratamento de proximidade dos biorresiduos primando a compostaxe domiciliaria e comunitaria. Demanda da implantación de sistemas de depósito, devolución e retorno para envases e embalaxes**
- **Implantación de sistemas de xestión pública do ciclo da auga que prioricen o aforro, a reutilización, a eficiencia das redes de distribución e tratamento, e a sensibilización social sobre o uso sustentábel da auga. Apoio a sistemas de xestión comunitaria da auga que primen o aforro, a eficiencia das redes de distribución, o consumo responsábel e a reutilización dos recursos.**
- **Fomento da produción e o consumo de proximidade, potenciando iniciativas de produción e comercialización de produtos locais.**
- **Potenciar os espazos naturais protexidos e a súa conectividade e impulsar iniciativas de posta en valor do monte apostando pola multifuncionalidade e a limitación das especies forestais como o eucalipto que degradan e empobrecen os ecosistemas.**

5. Creación dun comité ou gabinete de acción contra a emerxencia climática, en coordinación con outras instancias institucionais. O obxectivo deste comité é analizar, propoñer e coordinar todas as actuacións da institución para facerlle

fronte á crise climática tendo en conta as competencias na materia, que poderán ter a condición de Plan Director ou Plan Estratéxico fronte á emerxencia climática. A súa elaboración, desenvolvemento, seguimento e avaliación farase coa máxima participación social, coa necesaria perspectiva de xénero e con criterios de transparencia.

9.- MOCIÓNS.

Antes de entrar no punto décimo da orde do día relativo a rogos e preguntas, o sr. alcalde, de conformidade co previsto no artigo 91.4 do R.D. 2568/1986, de 28 de novembro, e no artigo 33 do Regulamento orgánico, pregunta se algún grupo municipal quere presentar algunha moción de urxencia, sen que se presente ningunha polos grupos municipais.

10.- ROGOS E PREGUNTAS.

ROGOS E PREGUNTAS FORMULADOS POLO BNG.

A concelleira do BNG, D^a. Carmen Diéguez, formula os seguintes rogos, os dous primeiro xa presentados por escrito, e preguntas:

- Trátase dun rogo sobre seguridade viaria no lugar do Pazo en Raris, a estrada que vai entre Sestelo e Bouñou, no Milladoiro, é moi estreita e moi recta, e os conductores/as non respectan os límites de velocidade de sentido común. Os veciños púxeronse en contacto con ela e por iso roga que se poñan bandas reductoras ou que se adopten outras medidas nese sentido.

- Roga que na urbanización que hai despois de Caxade se poñan contedores máis cerca, xa que teñen que levar o vidro a Luou ou á Ramallosa. Nota en falta máis sensibilidade por parte da poboación, habería que sensibilizar á xente para reciclar ben, e indica que as cunetas entre os Verxeles e O Piro están cheas de bolsas de lixo.

- En canto ás obras de Ribas, quedaron moi ben, pero a a veciñanza pide que se poden as árbores porque ocupan todo o espazo das aceiras, e pregunta se hai data para poñer bandas reductoras.

O sr. alcalde expón que o tema dos contedores o da sensibilización á veciñanza, o próximo ano remata o contrato de recollida de lixo e hai que plantexarse todos estes temas.

O portavoz do BNG, sr. Fernández Baz, formula os seguintes rogos e preguntas:

- O cano polo que bota auga da fonte en Sestelo está desfeito, habería que botarlle un ollo. É de ferro e os veciños piden si se podería poñer de outro material.
- Hai un escrito da comunidade de Campos de Mirabel que pide a colocación dun punto de luz á altura da fachada dun edificio, cambio da sinalización, sinalización reflectante nos pasos de peóns, establecer como velocidade máxima na rua 30 Km/hora, que se pinten as prazas de estacionamento para motocicletas nas catro esquinas da urbanización... Todo isto xa o pediu antes, pero agora o reitera, e quere saber como vai este tema.

A portavoz do PSdG-PSOE, sr. Lemus, contesta que algunha desas medidas xa está proxectada, e que hai un plan de mellora de accesibilidade que se vai licitar agora; en canto aos puntos de luz tería que consultalo cos técnicos, pero que en principio a zona está ben iluminada, e en canto as motocicletas indica que ten que falalo ca policía.

O sr. Fernández indica que hai punto onde a urbanización está moi iluminada, pero onde piden o punto de luz é nunha esquina que sí pode estar moi escura.

- En Solláns púxose un lombo e cando chove acumula auga e salpícase aos peóns que van pola acera. Urxe solucionalo agora que ven o inverno.
- Algún veciño dos Tilos lle cometa si sería posible achegar a marquesina dos Tilos á parada do bus?. A marquesina está no alto e o bus para antes da subida dado o paso elevado que hai.

A sra. Lemus indica que terían que mirar, entre outras cousas, o tamaño da acera dos Tilos.

- Presentou un rogo por escrito hai uns meses sobre o parque infantil en Cabovila, e pide que se volva a poñer sobre a mesa este asunto.
- Solicita, dirixéndose ao sr. Elías que tapen un pouco un bache que hai chegando a Fornelos na estrada principal. Hai outro bache baixando pola pista detrás do campo de fútbol de Calo, onde está a ponte, que está nunha alcantarilla e que si o colle séntelo.

ROGOS E PREGUNTAS FORMULADOS POLO PSdeG-PSOE.

Os/as concelleiros/as do PSdeG-PSOE non formulan ningún rogo nin pregunta.

ROGOS E PREGUNTAS FORMULADOS POLO PP.

O concelleiro do PP, sr. Sánchez, formula os seguintes rogos e preguntas:

- O sr. Sánchez, indica que na pista desde Loureiro, Luou, ata a A Grela en Lampai asfaltáronse uns poucos metros, e pregunta cando se asfaltarán máis.

A sr. Lemus, concelleira de urbanismo, seguridade cidadá, enerxía e sostibilidade, resposta que na seguinte tandada de contratación.

- Continúa o sr. Sánchez preguntando cando se rematará a obra e se porá en funcionamento o colector de Espasande. Xa preguntou antes das eleccións e se lle dixo que á volta do verán.

O sr. alcalde dixo que a el lle aseguran que principios de outubro se reanudaría a obra, pero cando se obtiveron os permisos a empresa estaba comprometida con outra obra.

O concelleiro do PP, sr. Guerra, formula os seguintes:

- O sr. Guerra pregunta di que sobre o parque de Cabovila, xa había un parque hai anos e hai tres anos xa acordaron facelo.

- O sr. Guerra expón que os veciños da urbanización de Monte en Cacheiras, dende o cambio de luminarias, seguen sen luz, son cinco farolas, oito casas, e levan tres ou catro meses sen luz.

A sra. Lemus expón que nesa fase, co cambio de luminarias, os cadros empezaron a dar erros, e se comprobou que o erro do cableado era moi grande, e houbo moitas discusións sobre a propiedade pública ou privada do muro, polo que o retraso é considerable, pero estase traballando para arranxalo.

-Continúa o sr. Guerra sinalando que na pista de Chao do Río a Outeiro, da fonte de abaixo á fonte de arriba, os veciños piden que se poñan uns tubos. O sr. Guerra pregunta que lle pode dicir aos veciños.

O sr. Moniño indica que que é un tema que se fará cando se poda.

A concelleira do PP, sra. Vázquez, formula os seguintes rogos e preguntas:

- A sr. Vázquez sinala que a pista que hai en Reis que sube pola aldea de Piñeiro hai catro anos que se pediu que se asfaltase, vai en costa e ten gravilla solta, preguntando se podería ter arreglo.

- Pregunta se hai posibilidades, unha vez que estea feito, de poñer luz no aparcadoiro de Pontevea, porque no se ve nada de noite.

A sra. Lemus resposta que están a traballar nelo, que xa faláron con Fenosa, pedindo orzamentos para colocar un punto de luz con placa solar.

A concelleira do PP, sra. Nariño, interésase polas actuacións que se van facer no cemiterio municipal de Penelas, porque na parte de diante está todo levantado e non sabe que se vai facer.

O sr. Elías indica que actuacións na instalación de auga.

A concellira do PP, sra. Calvo, indica que as obras de mellora do parque en San Sadurniño precisan moita luz, e que os veciños rogan que se manteña a estética das luminarias, e que se eliminen barreiras arquitectónicas na mesma urbanización, na medida do posible, insiste tamén no mal estado das aceras, e pide que se doten máis contedores de reciclaxe de vidro e pilas. Xa sabe que está anunciada unha reunión ca veciñanza.

A sra. Lemus sinala que as obras van ser en Montouto, vaise facer unha reurbanización, que se vai levar ao POS e que se van explicar aos veciños, pretendes evitar a inseguridade viaria desa zona.

Intervén a sra. Nariño para indicar, xa que se está a falar dos parques, que hai moitos que teñen materiais perigosos (ferro) e solicite que se lles cambie o material.

E non habendo máis asuntos que tratar, sendo as vinte e unha horas e cinco minutos, de orde da Presidencia, levántase a sesión, da que se estende a presente acta, do que eu, secretaria accidental, dou fe.

O alcalde
Rafael C. Sisto Edreira

A secretaria accidental
M^a Elena Sueiro Fernández